



ATASSUT
Steen Lynge

UPA2015/50
12.05.2015.

**Nunatsinni tamani utoqqaat illuisa pilersaarusiorfigineqarnissaanik siunnersuut
apeqquteqaat aallaavigalugu oqallittoqarnissaanik siunnersuut tamatumuuna
saqqummiuppara.**

(Inatsisartunut ilaasortaq Hans Enoksen, Partii Naleraq)

Partii Naleraq sinnerlugu Inatsisartuni ilaasortaq Hans Enoksen qutsavigaarput nunatsinni utoqqartatta imminnut isumagisinnaajunnaarsimallutik ulloq unnuarlu paaqqutarineqarfigisinnaasaminni utoqqaat illuini najugaqartut siunissamilu najugaqalerumaartussat sapinngisamik pitsaanerpaamik, toqqissisimanarnerpaamik aammalu avatangiiserissaarlutik inuuneqarsinnaanissaminnut eqqanaarunneqarnissaat matumani eqqarsaataammat.

ATASSUT-mit assut assorujussuaq pingaartipparput utoqqartavut toqqissisimallutik isumassorneqarluarlutillu inuuneqarnissaat tamatta akisussaaffigeqataassagipput.

Ilaqutaasut qanigisaasullu qanilaarnermikkut nalinginnaasumillu utoqqartaminnut ilaqutariit qanoq inuuneqarnerannik malinnaatitsillutillu utoqqartaminnik peqataatitsinermikkut, pisortat sinnerlugit Kommunit sumiiffinni utoqqartatsinnut qanimut sullissilluarnermikkut kiisalu Inatsisartut Naalackersuisullu utoqqartatta atugarissaarlutik inuuneqartinneqarnissaat qulakkeerniarlugu inatsisitigut sinaakkutarissaartitsinermikkut aammalu Kommunit kivitseqatigalugit toqqissisimasumik angerlarsimaffissaqartitsinikkut isumannaarinnittussaananer at pissusissamisuginnartut ATASSUT-mit isigaarput.

ATASSUT-mit assut iluarisimaakkatsinnik Naalackersuisut massakkut atuuttut aammalu taakku siulii utoqqartatsinnut atugassarititaasut eqqumaffigilluinnarpaat aammalu Nunatsinni Kommunit suleqatigalugit pisinnaanerusut angerlarsimaffissaannik pisinnaannginnerusullu ataatsimoorlutik ulloq unnuarlu isumassorneqarsinnaallutik angerlarsimaffeqarnissaminnut pisinnaatitaaffeqarnerat



pingaartippaat, taamatut Naalackersuisut Kommunillu ingerlatsinerat ATASSUT-mit assut toqqissisimanartuutippaaput.

Taamatulli oqareerluta aamma oqallisissiamik siunnersuuteqartup matumani siunnersuutigisaani qitiusoq, tassalu siunissami utoqqalisartut amerliartuinnartussaanerat aallaavigalugu utoqqaat ullui ullumikkut piusut pissutsinut naleqqussarneqarlutillu siunissami utoqqaliumaartussanut naleqqullutillu naammannissaat qulakkeerniarneqarnissaa pillugu Kommuninik qanimut suleqateqarnissaq pisariaqarpoq, ATASSUT-millu naammagisimaakkatsinnillu Naalackersuisut aallartilluareerput, taamaattorli sukumiisumik oqaloqatigiissutigalugit partiit akimorlugit ingerlatsigaanni ATASSUT-mit qularutiginnilarput angusassaq pitsaanerungaassasoq.

Utoqqaat illuisa pilersaarusiorkuammik pitsanngorsarneqarnissaat aammalu allilerneqarnissaat suliassaq pingaaruteqarluinnarpoq, taamatulli aamma pingaaruteqartigivoq ullumikkut utoqqartavut siunissamilu utoqqaliumaartut namminneq angerlarsimaffigisaminni utoqqalerusuttut pitsaasumik pisariaqartitsinertillu naapertorlugu sullinneqartarnerat qulakkeersimassallugu pingaaruteqarpoq aammalu pingaaruteqarpoq utoqqartatta utoqqaat illuannut nuuttussat nuuttussanngortarnerat sapinngisamik toqqissisimanartuunissaat.

Matumani siunnersuuteqartup ujartugaanut tunngatillugu sinaakkutissaq qitiusoq inerisarneqarluassasoq, tassalu aningaasanut inatsimmi konto pingarneq 83.30.12 Namminersorlutik Oqartussat Kommunillu peqatigiillutik inerisaanerminnut sinaakkutarilluarumaaraat qularutiginnilarput.

ATASSUT-mit oqallisissiamut aallarniutigalugit oqaaseriumasagut taakkuupput.